

七十二家集

高令公集題辭

蓋讀史至高令公而歎巧
詐之不如樸誠競躁之不
如恬愉也境有所必避而
慨慷以臨之事有所必趨
而靜默以鎮之貞不絕俗

忠不近名卒使威主可以
理奪澆暮因之化孚恥辱
何加尤悔雙遣儷景台鉉
九霄之樑棟自高閱祚頤
期一世之津梁未已微似
義俠全抽道心時近通人

終呈拙効蓋坤厚以載物
乾惕以自強孔所謂言忠
信行篤敬蠻貊可行庶幾
近之老所謂雄守雌白守
黑谿谷自如殆有進乎公
學靡所不淹識無所不透

翰墨而成勲績雖非所期
華實而兼春秋乃其餘事
惜方山之頌既闕而代都
之賦亦湮今以逸函還綜
大雅三復徵士頌恍挹延
陵墓中之劒焉卒業酒訓

差勝揚子井湄之觥焉

天啓甲子嘉平月朔日龍

溪張燮書于姑蘇之蔚霞

館

高令公集目錄

卷之一

賦

鹿苑賦

樂府

羅敷行

王子喬

詩

答宗欽十三章

宗欽贈高允十二章附

詠貞婦彭城劉氏八章

表

進天文要畧表

郡國建學表

疏

矯頽俗疏

諫起宮室疏

卷之二

上書

諫東宮上書

書

答宗欽書

宗欽與高允書附

頌

北伐頌

徵士頌有序

論

著論

訓

酒訓
有序

祭文

祭岱宗文

附錄

高允傳

北齊魏收

高允傳

唐李延壽

遺事

集評

高令公集卷之一

魏渤海高允伯恭著

明閩漳張燮紹和纂

賦

鹿苑賦

啓重基於朔土系軒轅之洪裔武承天以作主
熙大明以御世灑靈液以滂沱扇仁風以遐被
踵姬文而築苑包山澤以開制植群物以充務
蠲四民之常稅暨我皇之繼統誕天縱之明獻

追鹿野之在昔興三轉之高義振幽宗於已永
曠千載而可寄於是命匠選工刊茲西嶺注誠
端思仰模神影庶真容之髣髴耀金暉之煥炳
卽靈崖以構宇竦百尋而直正絙飛梁於浮柱
列荷華於綺井圖之以萬形綴之以清永若祇
洎之睜對執道場之塗迴嗟神功之所建超終
古而秀出寔靈樞之協贊故存貞而保吉鑿仙
窟以居禪闢重階以通術澄清氣於高軒佇流
芳於王室茂花樹以芬敷涌醴泉之洋溢祈龍

宮以降雨俾膏液於星畢若乃新造之隆行
貞簡慕德懷風杖策來踐守應貞之重禁味三
藏之淵典或步林以經衍或寂坐而端宴會衆
善以並臻排五難而俱遣道欲隱而彌彰名欲
駿而逾顯伊皇興之所幸每垂心於華園樂在
茲之間敞作離宮以營築固爽塏以崇居枕乎
原之高陸恬仁智之所懷眷山水以肆目玩藻
林以遊思絕鷹犬之馳逐眷耆年以廣德縱生
生以延福慧愛內隆金聲外發功濟普天善不

自伐尚諮賢以問道詢芻蕘以補闕盡敬恭於
靈寺遵晦望而致謁奉請戒以畢日兼六時而
宵月何精誠之至到良九劫之可越資聖王之
遠圖豈循常以明教希縉雲之上升羨頂生之
高蹈思離塵以邁俗涉玄門之幽奧禪儲宮以
正位受太上之尊號既存無而御有亦執靜以
鎮躁覩天規於今日尋先哲之遺誥悟二乾之
重蔭審明離之並照下寧濟於兆民上剋光於
七廟一萬國以從風總群生而爲導正南面以

無爲永措心於冲妙夫道化之難期幸微躬之
遭遇逢扶桑之初開遭長夜之始曙顧衰年以
懷傷惟負忝以危懼敢布心以陳誠效鄙言以
自著

詩

羅敷行

邑中有好女姓秦自羅敷巧笑美回盼鬢髮復
凝膚卿著花文履耳穿明月珠頭作墮馬髻倒
枕象牙梳娉娉善趨步檐檐曳長裾王侯爲之
顧駟馬自踟躕

王子喬

王子卿王少卿超升飛龍翔天庭遺儀景雲漢
朏光驚電逝忽若浮騎日月從列星跨騰八廓

踰杳冥尋元氣出天門窮覽有無究道根

答宗欽十三章

湯湯流漢藹藹南都載稱多士載耀靈珠邈矣
高族世記丹圖啟基郢城振彩涼區

吾生朗到誕發英風紹熙前緒奕世克隆方圓
備體淑德斯融望傾群雋響駭華戎

響駭伊何金聲允著匡贊西藩拯厥時務肅志
琴書恬心初素潛忠淵渟秀藻雲布

上天降命祚鍾有代協燿紫宸與乾作配仁邁

春陽功隆覆載招延隱叟永貽大賚

伊余櫟散才至庸微遭緣幸會忝與樞機竊名
華省厠足丹墀愧無螢燭少益天暉

明外非諭信漸難兼體卑處下豈曰能謙進不
弘道退失淵潛既慚朱闕亦愧閭閻

史班稱達楊蔡致深負荷典策載蹈於心四轍
同軌覆車相尋敬承嘉誨永佩明箴

遙思古賢內尋諸已仰謝丘明長揖南史遐武
雖存高蹤難擬夙興夕惕豈獲恬止

世之圯矣靈運未通風馬殊隔區域異封有懷
西望路險莫從王澤遠灑九服來同

在昔平吳二陸稱寶今也剋涼吾生獨矯道映
儒林義爲群表我思與之均於紵縞

仁乏田蘇量非叔度韓生屬降林宗仍顧千載
曠遊邁茲一遇藻詠風流鄙心已悟

年時迅邁物我俱逝任之斯通擁之則滯結駟
貽塵屢空亦敝兩間可守安有囿賜

詩以言志志以表丹慨哉刎頸義已中殘雖曰

不敏請事金蘭爾其勵之無忘歲寒

宗欽贈高允十二章附

鬼裁恒嶺浣潑滄溟山挺其和水燿其精啓
茲令族應期誕生華冠衆彥偉邁群英
於穆吾子含貞藉茂如彼松竹陵霜擢秀味
老思冲翫易體復戢翼九臯聲溢宇宙

我皇龍興重離疊映剛德外彰柔明內鏡乾
象奄氣坤厚山競風無殊音俗無異徑

經緯曰文著述曰史斟酌九流錯綜幽旨帝

用訓詔明發虛擬廣闊四門披延髦士
爾應其求翰飛東觀口吐瓊音手揮霄翰彈
毫珠零落紙錦粲墳無疑割典無滯泮
山降則謙含柔爲信林崇日漸明外斯進有
邈夫子兼茲四慎弱而難勝通而不峻
南薰邈矣史功不申固傾佞竇雄穢美新遷
以陵腐邑由卓泯時無逸勒路盈摧輪
尹佚謨周孔明述魯抑揚群致憲章三五昂
昂高生纂我遐武勿謂古今建規易矩

自昔索居沈淪西藩風馬旣殊標榜莫緣開
通有運閭遇當年披衿暫面定交一言
諮疑祕省訪滯京都水鏡叔度洗吝田蘇望
儀神婉卽象心虛悟言禮樂採研詩書
履霜悼遷撫節感變嗟我年邁迅踰激電進
乏由賜退非回憲素髮奄玄枯顏落舊
文以會友友由知己詩以明言言以通理盼
坎迷流覲艮闔止伊爾虬光肆鱗曲水

詠貞婦彭城劉氏八章

兩儀正位人倫肇甄爰制夫婦統業承先雖曰
異族氣猶自然生則同室終契黃泉

封生令達卓爲時彥內協黃中外兼三變誰能
作配克應其選寔有華宗挺生淑媛

京野勢殊山川乖互乃奉王命載馳在路公務
既弘私義獲著因媒致幣邁止一幕

率我初冠眷彼弱笄形由禮比情以趣諧忻願
難常影跡易乖悠悠言邁戚戚長懷

時值險屯橫離塵網伏鎖就刑身分土壤千里

雖遐應如影首良嬪洞感發於夢想

仰惟親命俯尋嘉好誰謂會淺義深情到畢志
守窮誓不二醮何以驗之殞身是效

人之處世孰不厚生心存於義所重則輕結憤
鍾心甘就幽冥永捐堂宇長辭母兄

茫茫中野翳翳孤丘葛藟冥蒙荆棘四周理苟

不帶神必俱游異哉貞婦曠世靡儔

渤海封卓妻劉氏彭

病入成婚一夕卓官於京師以事見法劉氏在
家忽形夢想知卓已死哀泣不止經旬凶問果
至遂憤歎而終時人比之秦嘉妻云
高允念其義高而名不著乃爲之詩

表

進天文要畧表

往年被勅令臣集天文災異使事類相從約而可觀臣聞箕子陳謨而洪範作宣尼述史而春秋著皆所以章明列辟景測皇天者也故先其善惡而驗以災異隨其失得而效以禍福天人誠遠而報速如響甚可懼也自古帝王莫不尊崇其道而稽其法數以自脩飭厥後史官並載其事以爲鑒誠漢成時光祿大夫劉向見漢祚

將危權歸外戚屢陳妖青而不見納遂因洪範
春秋災異報應者而爲其傳覲以感悟人主而
終不聽察卒以危亡豈不哀哉伏惟陛下神武
則天叡鑒自遠欽若稽古率由舊章前言往行
靡不究鑒前皇所不逮也臣學不洽聞識見寡
薄懼無以裨廣聖聽仰酬明旨今謹依洪範傳
天文志撮其事要略其文辭凡爲八篇

郡國建學表

臣聞經綸大業必以教養爲先咸秩九疇亦由
文德成務故辟雍光於周詩泮宮顯於魯頌自
永嘉以來舊章殄滅鄉閭蕪沒雅頌之聲京邑
杜絕釋奠之禮道業陵夷百五十載仰惟先朝
每欲憲章昔典經闡素風方事尙殷弗遑克復
陛下欽明文思纂成洪烈萬國咸寧百揆時敘
申祖宗之遺志興周禮之絕業爰發德音惟新
文教搢紳黎獻莫不幸甚臣承旨勅並集二省

披覽史籍備究典紀靡不敦儒以勸其業貴學以篤其道伏思明詔玄同古義宜如聖旨崇建學校以厲風俗使先王之道光演於明時郁郁之音流聞於四海請制大郡立博士二人助教四人學生一百人次郡立博士二人助教二人學生八十人中郡立博士一人助教二人學生六十人下郡立博士一人助教一人學生四十人其博士取博關經典世履忠清堪爲人師者年限四十以上助教亦與博士同年限三十以

上若道業夙成才任教授不拘年齒學生取郡
中清望人行修謹堪循名教者先盡高門次及
中第

疏

矯頽俗疏

前朝之世屢發明詔禁諸婚娶不得作樂及葬
送之日歌謠鼓舞殺牲燒葬一切禁斷雖條旨
久頒而俗不革變將由居上者未能悛改爲下
者習以成俗教化陵遲一至於斯昔周文以百
里之地修德布政先於寡妻及於兄弟以至家
邦三分天下而有其二明爲政者先自近始詩
云爾之教矣民胥効矣人君舉動不可不慎禮

云嫁女之家三日不息燭娶婦之家三日不舉樂今諸王納室皆樂部給伎以爲嬉戲而獨禁細民不得作樂此一異也古之婚者皆揀擇德義之門妙選貞閑之女先之以媒娉繼之以禮物集寮友以重其別親御輪以崇其敬婚姻之際如此之難今諸王十五便賜妻別居然所配者或長少差舛或罪入掖庭而作合宗王妃嬪藩懿失禮之甚無復此過往年及今頻有檢劾誠是諸王過酒致責跡其元起亦由色衰相棄

致此紛紜今皇子娶妻多出宮掖令天下小民
必依禮限此二異也萬物之生靡不有死古先
哲王作爲禮制所以養生送死折諸人情若毀
生以奉死則聖人所禁也然葬者藏也死者不
可再見故深藏之昔堯葬穀林農不易畝舜葬
蒼梧市不改肆秦始皇作爲地市下錮三泉金
玉寶貨不可計數死不旋踵尸焚墓掘由此推
之堯舜之儉始皇之奢是非可見今國家營葬
費捐巨億一旦焚之以爲灰燼苟靡費有益於

亡者古之人奚獨不然今上爲之不輟而禁下
民之必止此三異也古者祭必立尸序其昭穆
使亡者有憑致食饗之禮今已葬之魂人直求
貌類者事之如父母燕好如夫妻叔風化續
亂情禮莫此之甚上未禁之下不改絕此四異
也夫饗者所以定禮儀訓萬國故聖王重之至
乃爵盈而不飲肴乾而不食樂非雅聲則不奏
物非正色則不列今之大會內外相混酒醉喧
譟罔有儀式又俳優鄙藝汚辱視聽朝廷積習

以爲美而責風俗之清純此五異也今陛下當
百王之末踵晉亂之弊而不矯然釐改以厲頽
俗臣恐天下蒼生永不聞見禮教矣

諫起宮室疏

臣聞太祖道武皇帝既定天下始建都邑其所
營立非因農隙不有所興今建國已久宮室已
備永安前殿足以朝會萬國西堂溫室足以安
御聖躬紫樓臨望可以觀望遠近若廣修壯麗
爲異觀者宜漸致之不可倉卒計斫材運土及
諸雜役須二萬人丁夫充作老小供餉合四萬
人半年可訖古人有言一夫不耕或受其饑一
婦不織或受其寒况數萬之衆其所損廢亦以

多矣推之於古驗之於今必然之效也誠聖主
所宜思量

高令公集卷之二

魏渤海高允伯恭著

明閩漳張熨紹和纂

上書

諫東宮上書

天地無私故能覆載王者無私故能包養昔之
明王以至公宰物故藏金於山藏珠於淵示天
下以無私訓天下以至儉故美聲盈溢千載不
衰今殿下國之儲貳四海屬心言行舉動萬方

所則而營立私田畜養鷄犬乃至販酤市鄽與
民爭利議聲流布不可追掩夫天下者殿下之
天下富有四海何求而不獲何欲而弗從而與
販夫販婦競此尺寸昔號之將亡神乃下降賜
之土田卒喪其國漢之靈帝不修人君之重好
與宮人列肆販賣私立府藏以營小利卒有顛
覆傾亂之禍前鑒若此甚可畏懼夫爲人君者
必審於擇人故稱知人則哲惟帝難之商書云
無迺小人孔父有云小人近之則不遜遠之則

怨矣武王愛周召齊畢所以王天下殷紂愛飛廉惡來所以喪其國歷觀古今存亡之際莫不由之今東宮誠曰乏人雋又不少頃來侍御左右者恐非在朝之選故願殿下少察愚言斥出佞邪親近忠良所在田園分給貧下畜產販賣以時收散如此則休聲日至謗議可除

書

答宗欽書

頃因行李承足下高問延佇之勞爲日久矣王途一啓得敘其懷欣於相遇情無有已足下兼愛爲心每能存顧養之以風味惠之以德音執旣反覆銘於心抱吾少乏尋常之操長無老成之致憑賴賢聖以自克勉而來喻褒飾有過其分旣承雅贈卽應有答但唱高則難和理深則難酬所以留連日月以至於今今往詩一篇誠

不足標明來旨且表以心幸恕其鄙滯領其至
意

宗欽與高允書附

昔皇綱未振華裔殊風九服分隔金蘭莫遂
希懷寄契遙想積久天遂其願爰邁京師才
非季札而眷深孫僊德垂程子而義均傾盖
曠齡罕遇會之一朝比公私理異訓諮路塞
端拱蓬宇歎慨如何不量鄙拙貢詩數韻若
夫泉江相忘之談遺言存意之美雖莊生之

所尚非淺識所宜循愛敬既深情期往返思
遲德意以祛鄙吝若能紆鳳彩以耀榛蒼廻
連城以映瓦礫者其所望也

頌

北伐頌

皇矣上天降鑒惟德眷命有魏照臨萬國禮化
丕融王猷允塞靜亂以威穆民以則北虜舊隸
稟政在蕃徃因時 逃命北轅世襲凶軌背忠
食言招亡聚盜醜類實繁敢率犬羊圖縱猖蹶
乃詔訓師興戈北伐躍馬裹糧星馳電發撲討
虔劉肆陳斧鉞斧鉞暫陳馘翦厥旅積骸填谷
流血成浦元兇狐奔假息窮墅爪牙旣摧腹心

亦阻周之忠厚存及行葦翼翼聖明有兼斯美
澤被京觀垂此仁旨封尸野獲惠加生死生死
蒙惠人欣覆育理貫幽冥澤漸殊域物歸其誠
神獻其福遐邇斯懷無思不服古稱善兵歷時
始捷今也用師辰不及浹六軍克合萬邦以協
義著春秋功銘玉牒載興頌聲播之來葉

徵士頌有序

昔歲同徵零落將盡感逝懷人作徵士頌蓋
止於應命者其有命而不至則闕焉群賢之
行舉其梗槩矣今著之於左

中書侍郎固安伯范陽盧玄子真

郡功曹史博陵崔緯茂祖

河內太守下樂侯廣寧燕崇玄畧

上黨太守高邑侯廣寧常陟公山

征南大將軍從事中郎渤海高毗子翼

征南大將軍從事中郎渤海李欽道賜

河西太守饒陽子博陵許堪祖根

中書郎新豐侯京兆杜銓士衡

征西大將軍從事中郎京兆韋閔友規

京兆太守趙郡李詵令孫

太常博士鉅鹿公趙郡李靈虎符

中書郎中郎丘子趙郡李遐仲熙

營州刺史建安公太原張偉仲業

輔國大將軍從事中郎范陽祖邁

征東大將軍從事中郎范陽祖侃士倫

東郡太守蒲陰子中山劉策

濮陽太守真定子常山許琰

行司隸校尉中郎侯西河宣道茂

中書郎燕郡劉遐彥鑒

中書郎武恒子河間邢頴宗敬

滄水太守浮陽侯渤海高濟叔民

太平太守平原子鴈門李熙士元

祕書監梁郡公廣平游雅伯度

廷尉正安平子博陵崔建興祖

廣平太守列人侯西河宋愔

州主簿長樂潘天符

郡功曹長樂杜熙

征東大將軍從事中郎中山張綱

中書郎上谷張誕叔術

祕書郎鴈門王道雅

祕書郎鴈門閔弼

衛大將軍從事中郎中山郎苗

大司馬從事中郎上谷侯辯

陳留郡太守高邑子趙郡呂季才

夫百王之御士也莫不資使群才以隆治道故
周文以多士克寧漢武以得賢爲盛此載籍之
所記由來之常義魏自神璽已後宇內平定誅
赫連積世之僭掃窮髮不羈之寇南摧江楚西
盪涼域殊方之外慕義而至於是一偃兵息甲修
立文學登延偶造酬諮政事夢想賢哲思遇其
人訪諸有司以求名士咸稱范陽盧玄等四十

二人皆冠冕之胄著閭州邦有羽儀之用親頒
明詔以徵玄等乃曠官以待之懸爵以縻之其
就命三十五人自餘依例州郡所遣者不可稱
記爾乃髦士盈朝而濟濟之美興焉昔與之俱
蒙斯舉或從容廊廟或游集私門上談公務下
盡忻悞以爲千載一時始於此矣日月推移吉
凶代謝同徵之人凋殲殆盡在者數子然復分
張往昔之忻變爲悲感張仲業東臨營州遲其
還返一敘于懷齊衿于垂歿之年寫情於桑榆

之末其人不幸復至殞歿在朝者皆後進之士
居里者非疇昔之人進涉無寄心之所出入無
解顏之地顧省形骸所以永歎而不已夫頌者
美盛德之形容亦可以言寄意不爲文二十年
矣然事切於心豈可默乎遂爲之頌詞曰

紫氣干霄群雄亂夏王龔徂征戎車屢駕掃盪
遊氛克剪妖霸四海從風八垠漸化政教無外
既寧且一偃武櫜兵唯文是恤帝乃旁求搜賢
舉逸嚴隱授竿異人並出疊疊廬生量遠思純

鑽道據德遊藝依仁旌弓既招釋褐投巾攝齊
升堂嘉謀日陳自東徂南躍馬馳輪僭憑影附
劉以和親茂祖榮單夙罹不造克已勉躬聿隆
家道敦心六經遊思文藻終辭寵命以之自保
燕常篤信百行靡遺位不苟進任理栖遲居冲
守約好讓善推思賢樂古如渴如饑子翼致達
道賜悟深相期以義相和若琴竝參幕府俱發
德音優游卒歲聊以寄心祖根運會克光厥猷
仰緣朝恩俯因德友功雖後建祿實先受班同

舊臣位竝群后士衡孤立內省靡疚言不崇華
交不遺舊以產則貧論道則富所謂伊人實邦
之秀卓矣友規稟茲淑量存彼大方擯此細讓
神與理冥形隨流浪雖屈王侯莫廢其尚趙實
名區世多奇士山嶽所鍾挺生三李矯矯清風
抑抑容止初九而潛望雲而起詵尹西都靈惟
作傳垂訓皇宮載理雲霧熙雖中天迹階卽署
餘塵可挹終亦顯著仲業淵長雅性清到憲章
古式綢繆典誥時值險難常一其操納衆以仁

訓下以孝化被龍川民歸其教邁則英賢佩亦
稱選聞達邦家名行素顯志在兼濟豈伊獨善
繩匠弗顧功不獲展劉許履忠竭力致躬出能
騁說入獻其功輶軒一舉撓燕下崇名彰魏世
享業亦隆道茂夙成弱冠播名與朋以信行物
以誠怡怡昆弟穆穆家庭發響九臯翰飛紫冥
頻在省闈亦司于京刑以之中政以之平猗歟
彥鑒思參文雅率性任真器成非假靡矜于高
莫耻于下乃謝朱門歸迹林野宗敬延譽號爲

四雋華藻雲飛金聲夙振中遇沈疴賦詩以訊
忠顯於辭理出於韻高滄朗達默識淵通領新
悟異發自心曾質侔和璧文炳雕龍耀姿天邑
衣錦舊邦士元先覺介焉不惑振袂來庭始賓
王國蹈方履正好是繩墨淑人君子其儀不忒
孔稱游夏漢美淵雲越哉伯度出類踰群司言
祕閣作牧河汾移風易俗理亂解紛融彼滯義
渙此潛文儒道以析九流以分崔宋二賢誕性
英偉擢穎閭閻聞名象魏蹇蹇儀形邈邈風氣

達而不矜素而能貴潘符標尚杜熙好和清不
潔流渾不同波絕希龍津止分常科幽而逾顯
損而逾多張綱柔謙叔術正直道雅洽聞弼爲
兼識拔萃衡門俱漸鴻翼發憤忘餐豈要斗食
率禮從仁罔愆于式失不繫心得不形色即苗
始舉用均已試智足周身言足爲治性協於時
情敏於事與今而同與古曷異物以利移人以
酒昏侯生潔已唯義是敦日縱醇醪逾敬逾溫
其在私室如涉公門季才之性柔而執競屈彼

南秦申威致命誘之以權矯之以正帝道用光
邊土納慶群賢遭世顯名有代志竭其忠才盡
其槩體襲朱裳腰紐雙佩榮曜當時風高千載
君臣相遇理實難脩昔因朝命與之克諧披衿
散想解帶舒懷此昕如昨存亡奄乖靜言思之
中心九摧揮毫頌德潛爾增哀

論

著論

劉潔嘗謂私人曰若專駕不還吾當立樂平王及潔誅王以憂死日者董道秀亦誅

免著論

昔明元末起白臺其高二十餘丈樂平王嘗夢登其上四望無所見王以問日者董道秀筮之曰大吉王默而有喜色後事發王遂憂死而道秀棄市道秀若推六爻以對王曰易稱亢龍有悔窮高曰亢高而無民不爲善也夫如是則上

寧於王下保於已福祿方至豈有禍哉今舍於
本而從其末咎讎之至不亦宜乎

訓

酒訓 有序

臣被勅諭集往世酒之敗德以爲酒訓臣以朽
邁遭人倫所棄而殊恩過隆錄臣於將歿之年
勗臣於已墜之地奉命驚惶喜懼兼甚不知何
事可以上答伏惟陛下以淑哲之姿撫臨萬國
太皇太后以聖德之廣濟育群生普天之下罔
不稱賴然日昃憂勤虛求不已思監往事以爲
警戒此之至誠悟通百靈而況於百官士民不

勝踴躍謹竭其所見作酒訓一篇但臣愚短加以荒廢辭義鄙拙不足觀採伏願聖慈體臣慙慙之情恕臣狂瞽之意其詞曰

自古聖王其爲饗也玄酒在堂而醕酒在下所以崇本重原降於滋味雖汎爵旅行不及於亂故能禮章而敬不虧事畢而儀不忒非由斯致是失其道將何以範時軌物垂之於世歷觀往代成敗之效吉凶由人不在數也商辛耽酒殷道以之亡公旦陳誥周德以之昌子反昏酣而

致弊穆生不飲而身光或長世而爲戒或百代而流芳酒之爲狀變惑情性雖曰哲人孰能自競在官者殆於政也爲下者慢於令也聰達之士荒於聽也柔順之倫興於諄也久而不悛致於病也豈止於病乃損其命諺亦有云其益如毫其損如刀言所益者止於一味之益不亦寡乎言所損者天年亂志天亂之損不亦夥乎無以酒荒而陷其身無以酒狂而喪其倫迷邦失道流浪漂津不師不遵反將何因詩不言乎如

切如磋如琢如磨朋友之義也作官以箴之申
謨以禁之君臣之道也其言也善則三覆而佩
之言之不善則哀矜而貸之此實先王納規之
意往者有晉士多失度肆散誕以爲不羈縱長
斟以爲高達調酒之頌以相眩曜稱堯舜有千
鐘百觚之飲著非法之言引大聖爲譬以則天
之嗣豈其然乎且子思有云夫子之飲不能一
升以此推之千鐘百觚皆爲妄也今大魏應圖
重明御世化之所暨無思不服仁風敦洽於四

海太皇太后以至德之隆誨而不倦憂勤備於
皇情誥訓行於無外故能道協兩儀功同覆載
仁恩下逮罔有不遵普天率土靡不蒙賴在朝
之士有志之人宜克已從善履正存貞節酒以
爲度順德以爲經恬昏飲之美疾奢敬慎之彌
榮遵孝道以致養顯父母而揚名蹈閔曾之前
軌遺仁風於後生仰以答所授俯以保其成可
不勉歟可不勉歟

祭文

祭岱宗文

維皇興二年敢昭告於岱宗之靈正趾坤元作
鎮東夏齊二儀以求固崇至德以配天故能資
元氣以造物協陰陽而變化著其崑嶺峭峙川
谷幽深神怪譎詭倏忽百靈吐納風雲育成萬
品攝生之所歸焉禎祥之所萃焉是以歷代帝
王之崇封禪銘功以告其成七十二君咸在茲
焉自非功侔造化應同自然孰能若此者哉自

我國家肅恭禋祀懷柔百神邦域之內罔不咸
秩往以天路未夷雖望祭有在今大化既同奄
有淮岱謹薦於嶽宗之靈尚饗

附錄

高允傳

齊魏 收

高允字伯恭渤海人也祖泰在叔父湖傳父韜少以英朗知名同郡封懿雅相敬慕爲慕容垂太尉從事中郎太祖平中山以韜爲丞相參軍早卒允少孤夙成有奇度清河崔玄伯見而異之歎曰高子黃中內潤文明外昭必爲一代偉器但恐吾不見耳年十餘奉祖父喪還本郡推財與二弟而爲沙門名法淨未久而罷性好文

學擔笈負書千里就業博通經史天文術數尤
好春秋公羊郡召功曹神嘉三年世祖舅陽平
王杜超行征南大將軍鎮鄴以允爲從事中郎
年四十餘矣超以方春而諸州囚多不決乃表
允與中郎呂熙等分詣諸州共評獄事熙等皆
以貪穢得罪唯允以清平獲賞府解還家教授
受業者千餘人四年與盧玄等俱被徵拜中書
博士遷侍郎與太原張偉並以本官領衛大將
軍樂安王範從事中郎範世祖之寵弟西鎮長

安允甚有匡益泰人稱之尋被徵還允曾作塞
上翁詩有混欣戚遺得喪之致驃騎大將軍樂
平王丕西討上邽復以本官參丕軍事語在丕
傳涼州平以參謀之勲賜爵汶陽子加建武將
軍後詔允與司徒崔浩述成國記以本官領著
作卽時浩集諸術士考校漢元以來日月薄蝕
五星行度并識前史之失別爲魏曆以示允允
曰天文曆數不可空論夫善言遠者必先驗於
近且漢元年冬十月五星聚於東井此乃曆術

之淺今譏漢史而不覺此謬恐後人譏今猶今
之譏古浩曰所謬云何允曰案星傳金水二星
常附日而行冬十月日在尾箕昏沒於申南而
東井方出於寅北二星何因背日而行是史官
欲神其事不復推之於理浩曰欲爲變者何所
不可君獨不疑三星之聚而怪二星之來允曰
此不可以空言爭宜更審之時坐者咸怪唯東
宮少傅游雅曰高君長於曆數當不虛也後歲
餘浩謂允曰先所論者本不注心及更考究果

如君語以前三月聚於東井非十月也又謂雅
曰高允之術陽元之射也衆乃歎服允雖明於
曆數初不推步有所論說唯游雅數以災異問
允允曰昔人有言知之甚難既知復恐漏泄不
如不知也天下妙理至多何遽問此雅乃止尋
以本官爲秦王翰傳後勅以經授恭宗甚見禮
待又詔允與侍郎公孫質李虛胡方回共定律
令世祖引允與論刑政言甚稱旨因問允曰萬
機之務何者爲先是時多禁封良田又京師遊

食者衆允因言曰臣少也賤所知唯田請言農
事古人云方一里則爲田三頃七十畝百里則
田三萬七千頃若勤之則畝益三升不勤則畝
損三升方百里損益之率爲粟二百二十二萬
斛況以天下之廣乎若公私有儲雖遇饑年復
何憂哉世祖善之遂除田禁悉以授民初崔浩
薦冀定相幽并五州之士數十人各起家郡守
恭宗謂浩曰先召之人亦州郡選也在職已久
勤勞未答今可先補前召外任郡縣以新召者

代爲郎吏又守令宰民宜使更事者浩固爭而
遣之允聞之謂東宮博士管恬曰崔公其不免
乎苟逞其非而校勝於上何以勝濟遼東公翟
黑子有寵於世祖奉使并州受布千疋事尋祭
覺黑子請計於允曰主上問我爲首爲諱乎允
曰公帷幄寵臣答詔宜實又自告忠誠罪必無
慮中書侍郎崔覽公孫質等咸言首實罪不可
測宜諱之黑子以覽等爲親已而反怒允曰如
君言誘我死何其不直遂與允絕黑子不以實

對竟爲世祖所疎終獲罪戮是時著作令史闕
湛郃櫟性巧佞爲浩信待見浩所注詩論語尚
書易遂上疏言馬鄭王賈雖注述六經竝多疏
謬不如浩之精微乞收境內諸書藏之祕府班
浩所注命天下習業并求勅浩注禮傳令後生
得觀義浩亦表薦湛有著述之才旣而勸浩
刊所撰國史於石用垂不朽欲以彰浩直筆之
跡允聞之謂著作卽宗欽曰閱湛所營分寸之
間恐爲崔門萬世之禍吾徒無類矣未幾而難

作初浩之被收也允直中書省恭宗使東宮侍
郎吳延召允仍留宿宮內翌日恭宗入奏世祖
命允驂乘至宮門謂曰入常見至尊吾自導卿
脫至尊有問但依吾語允請曰爲何等事也恭
宗曰入自知之既入見帝恭宗曰中書侍郎高
允自在臣官同處累年小心密慎臣所委悉雖
與浩同事然允微賤制由於浩請赦其命世祖
召允謂曰國書省崔浩作不允對曰太祖記前
著作郎鄧淵所撰先帝記及今記臣與浩同作

然浩綜務處多總裁而已至於注疏臣多於浩
世祖大怒曰此甚於浩安有生路恭宗曰天威
嚴重允是小臣迷亂失次耳臣向備問皆云浩
作世祖問如東宮言不允曰臣以下才謬參著
作犯逆天威罪應滅族今已分死不敢虛妄殿
下以臣侍講日久哀臣乞命耳實不問臣臣無
此言臣以實對不敢迷亂世祖謂恭宗曰直哉
此亦人情所難而能臨死不移不亦難乎且對
君以實貞臣也如此言寧失一有罪宜宥之允

竟得免於是召浩前使人詰浩浩惶惑不能對
允事事申明皆有條理時世祖怒甚勅允爲詔
自浩已下僮吏已上百二十八人皆夷五族允
持疑不爲頻詔催切允乞更一見然後爲詔詔
引前允曰浩之所坐若更有餘釁非臣敢知直
以犯觸罪不至死世祖怒命介士執允恭宗拜
請世祖曰無此人忿朕當有數千口死矣浩竟
族滅餘皆身死宗欽臨刑歎曰高允其殆聖乎
恭宗後讓允曰人當知機不知機學復何益當

爾之時吾導卿端緒何故不從人言怒帝如此
每一念之使人心悸允曰臣東野凡生本無宦
意歸休延之會應旌弓之舉釋褐鳳池仍參麟
閣尸素官榮妨賢已久夫史籍者帝王之實錄
將來之炯戒今之所以觀往後之所以知今是
以言行舉動莫不備載故人君慎焉然浩世受
殊遇榮曜當時孤負聖恩自貽灰滅卽浩之跡
時有可論浩以蓬蒿之才荷棟梁之重在朝無
寒謬之節退私無委蛇之稱私欲沒其公廉愛

憎蔽其直理此浩之責也至於書朝廷起居之
跡言國家得失之事此亦爲更憲大體未爲多
違然臣與浩實同其事死生榮辱義無獨殊誠
荷殿下大造之慈違心苟免非臣之意恭宗動
容稱歎允後與人言我不奉東宮導官者恐負
翟黑子恭宗季年頗親近左右營立田園以取
其利允諫恭宗不納恭宗之崩也允久不進見
後世祖召允升階欷歔悲不能止世祖流淚命
允使出左右莫知其故相謂曰高允無故悲泣

令至尊哀傷何也世祖聞之召而謂之曰汝不知高允悲乎左右曰臣等見允無言而泣陛下爲之悲傷是以竊言耳世祖曰崔浩誅時允亦應死東宮苦諫是以得免今無東宮允見朕因悲耳允表進天文志撮其事要略其文辭凡爲八篇世祖覽而善之曰高允之明災異亦豈減崔浩乎及高宗卽位允頗有謀焉司徒陸麗等皆受重賞允既不蒙褒異又終身不言其忠而不伐皆此類也給事中郭善明性多機巧欲逞

其能勸高宗大起宮室允諫宜思量高宗納之
允以高宗纂承平之業而風俗仍舊婚娶喪葬
不依古式允諫稱五異高宗從容聽之或有觸
迂帝所不忍聞者命左右扶出事有不便允輒
求見高宗知允意逆屏左右以待之禮敬甚重
晨入暮出或積日居中朝臣莫知所論或有上
書陳得失者高宗省而謂群臣曰君父一也父
有是非子何爲不作書於人中諫之使人知惡
而於家內隱處也豈不以父親恐惡彰於外也

今國家善惡不能面陳而上表顯諫此豈不彰
君之短明已之美至如高允者真忠臣矣朕有
是非常正言面論至朕所不樂聞者皆侃侃言
說無所避就朕聞其過而天下不知其諫豈不
忠乎汝等在左右曾不聞一正言但伺朕喜時
求官乞職汝等把弓刀侍朕左右徒立勞耳皆
至公王此人把筆匡我國家不過作郎汝等不
自愧乎於是拜允中書令著作如故司徒陸麗
曰高允雖蒙寵待而家貧布衣妻子不立高宗

怒曰何不先言今見朕用之方言其貧是日幸
允第惟草屋數間布被縕袍厨中鹽菜而已高
宗歎息曰古人之清貧豈有此乎即賜帛五百
匹粟千斛拜長子忱爲綏遠將軍長樂太守允
頻表固讓高宗不許初與允同徵游雅等多至
通官封侯及允部下吏百數十人亦至刺史二
千石而允爲郎二十七年不徙官時百官無祿
允常使諸子樵采自給初尚書竇瑾坐事誅瑾
子遵亡在山澤遵母焦没入縣官後焦以老得

免瑾之親故莫有恤者允愍焦年老保護在家
積六年遵始蒙赦其篤行如此轉太常卿本官
如故允上代都賦因以規諷亦二京之涼也文
多不載時中書博士索敞與侍郎傅默梁祚論
名字貴賤著議紛紜允遂著名字論以釋其惑
甚有典證復以本官領祕書監解太常卿進爵
梁城侯加左將軍初允與游雅及太原張偉同
業相友雅嘗論允曰夫喜怒者有生所不能無
也而前史載卓公寬中文饒洪量褊心者或之

弗信余與高子遊處四十年矣未嘗見其是非
愠喜之色不亦信哉高子內文明而外柔弱其
言呐呐不能出口余常呼爲文子崔公謂余云
高生豐才博學一代佳士所乏者矯矯風節耳
余亦然之司徒之譴起於纖微及於詔責崔公
聲嘶股戰不能言宗欽以下伏地流汗都無人
色高子敷陳事理申釋是非辭義清辯音韻高
亮明主爲之動容聽者無不稱善仁及寮友保
茲元吉向之所謂矯矯者更在斯乎宗愛之任

勢也威振四海嘗召百司於都坐王公以下望
庭畢拜高子獨升階長揖由此觀之汲長孺可
卧見衛青何抗禮之有向之所謂風節者得不
謂此乎知人固不易人亦不易知吾既失之於
心內崔亦漏之於形外鍾期止聽於伯牙夷吾
見明於鮑叔良有以也其爲人物所推如此高
宗重名常不名之恒呼爲令公令公之號播於
四遠矣高宗崩顯祖居諒闇乙渾專擅朝命謀
危社稷文明太后誅之引名禁中參決大政又

詔允曰自頃以來庠序不建爲日久矣道肆陵
遲學業遂廢予矜之歎復見於今朕旣纂統大
業八表晏寧稽之舊典欲置學宮於郡國使進
修之業有所津寄卿儒宗元老朝望舊德宜與
中祕二省參議以聞允表分別諸郡學置師徒
有差顯祖從之郡國立學自此始也後允以老
疾頻上表乞骸骨不許於是著告老詩又以昔
歲同徵零落將盡感逝懷人作徵士頌皇興中
詔允兼太常至兖州祭孔子廟謂允曰此簡德

而行勿有辭也後允從顯祖北伐大捷而還至武川鎮上北伐頌顯祖覽而善之又顯祖時有不豫以高祖冲幼欲立京兆王子推集諸大臣以次召問允進跪上前涕泣曰臣不敢多言以勞神聽願陛下上思宗廟託付之重追念周公抱成王之事顯祖於是傳位於高祖賜帛千匹以標忠亮又遷中書監加散騎常侍雖久典史事然而不能專勤屬述時與校書郎劉模有所緝綴大較續崔浩故事準春秋之體而時有刊

正身高宗迄於顯祖軍國書檄多允文也末年
乃薦高閭以自代以定議之勲進爵咸陽公加
鎮東將軍尋授使持節散騎常侍征西將軍懷
州刺史允秋月巡境問民疾苦至邵縣見邵公
廟廢毀不立乃曰邵公之德闕而不禮爲善者
何望乃表聞修葺之允於時年將九十矣勸民
學業風化頗行然儒者優遊不以斷臬爲事後
正光中中散大夫中書舍人河內常景追思允
帥郡中故老爲允立祠於野王之南樹碑紀德

焉太和二年又以老乞還鄉里十餘章上卒不
聽許遂以疾告歸其年詔以安車徵允勅州郡
發遣至都拜鎮軍大將軍領中書監固辭不許
又扶引就內改定皇誥允又奉勅作酒訓高祖
悅之常置左右詔允乘車入殿朝賀不拜明年
詔允議定律令雖年漸期頤而志識無損猶心
存舊職拔考史書又詔曰允年涉危境而家貧
養薄可令樂部絲竹十人五日一詣允以娛其
志特賜允蜀牛一頭四望蜀車一乘素几杖各

一蜀刀一口又賜珍味無春秋常致之尋詔朝
哺給膳朔望致牛酒衣服綿絹每角送給允皆
分之親故是時貴臣之門皆羅列顯官而允子
弟皆無官爵其廉退若此遷尚書散騎常侍時
延入備几杖問以政治十年加光祿大夫金章
紫綬朝之大議皆咨訪焉魏初法嚴朝士多見
杖罰允歷事五帝出入三省五十餘年初無譴
咎初眞君中以獄訟留滯始令中書以經義斷
諸疑事允據律評刑三十餘載內外稱平允以

獄者民之命也常歎曰臯陶至德也其後英蓼
先亡劉項之際英布黥而王經世雖久猶有刑
之餘釁况凡人能無咎乎其年四月有事西郊
詔以御馬車迎允就郊所板殿觀囑馬忽驚奔
車轢傷肩三處高祖文明太后遣醫藥護治存
問相望司駕將處重坐允啟陳無恙乞免其罪
先是命中黃門蘇興壽扶持允曾雪中遇犬驚
倒扶者大懼允慰勉之不令聞徹興壽稱共允
接事三年未嘗見其忿色恂恂善誘誨人不倦

晝夜手常執書吟詠尋覽篤親念故虛已存納
雖處貴重志同貧素性好音樂每至伶人弦歌
鼓舞常擊節稱善又雅信佛道時設齋講好生
惡殺性又簡至不妄交遊顯祖平青齊徙其族
望於代時諸士人流移遠至率皆饑寒徙人之
中多允姻媾皆徒步造門允散財竭產以相贍
賑慰問周至無不感其仁厚收其才能表奏申
用時議者皆以新附致異允謂取材任能無宜
抑屈先是允被召在方山作頌志氣猶不多損

談說舊事了無所遺十一年正月卒年九十八
初先母謂人曰吾在中書時有陰德濟救民命
若陽報不差吾壽應享百年矣先卒旬外微有
不適猶不寢卧呼醫請藥出入行止吟詠如常
高祖文明太后聞而遣醫李脩往脉視之告以
無恙脩入密陳先榮衛有異懼其不久於是遣
使備賜御膳珍羞自漚米至於鹽醢百有餘品
皆盡時味及牀帳衣服茵被几杖羅列於庭王
官往還慰問相屬先嘉形於色語人曰天恩以

我篤老大有所資得以贍客矣表謝而已不有
他慮如是數日夜中卒家人莫覺詔給絹一千
匹布二千匹綿五百斤錦五十匹雜綵百匹穀
千斛以周喪用魏初以來存亡蒙資者莫及焉
朝廷榮之將葬贈侍中司空公冀州刺史將軍
公如故謚曰文賜命服一襲允所製詩賦誄頌
箴論表讚左氏公羊釋毛詩拾遺論雜解議何
鄭膏肓事凡百餘篇別有集行於世允明算法
爲算術三卷子枕襲

史臣曰依仁遊藝執義守詰其司空高允乎蹈
危禍之機抗雷電之氣處死夷然忘身濟物卒
悟明主保已全身自非體隣知命鑒照窮達亦
何能以若此宜其光寵四世終享百齡有魏以
來斯人而已僧裕學治有聞聿脩之義也

高允傳

唐李延壽

高允字伯恭渤海脩人漢太傅裒之後也曾祖
慶慕容垂司空祖父泰吏部尚書父韜少以英
朗知名同郡封懿雅相推敬亦仕慕容垂爲太
尉從事中郎道武平中山以爲丞相參軍早卒
允少孤夙成有奇度清河崔宏見而異之歎曰
高子黃中內潤文明外照必爲一代偉器但吾
恐不見耳年十餘歲祖父泰喪還本郡允推財
與二弟而爲沙門名法淨未久而罷性好文學

擔笈負書千里就業博通經史天文術數尤好
春秋公羊曾作塞上公詩有混欣戚遺得喪之
致神廡三年太武舅陽平王杜超行征南大將
軍鎮鄴以允爲從事中郎年四十餘矣超以方
春而諸州囚不決表允與中郎呂熙等分詣諸
州共評獄事熙等皆以貪穢得罪唯允以清平
獲賞府解還家教授受業者千餘人四年與盧
玄等俱被徵拜中書博士遷侍郎與太原張偉
並以本官領衛大將軍樂安王範從事中郎範

太武寵弟西鎮長安允甚有匡益秦人稱之尋
被徵還樂平王丕西討上邽復以本官參丕軍
事以謀平涼州之勲賜爵汶陽子後奉詔領著
作郎與司徒崔浩述成國記時浩集諸術士考
校漢元以來日月薄蝕五星行度并譏前史之
失別爲魏曆以示允允曰善言遠者必先驗於
近且漢元年冬十月五星聚於東井此乃曆術
之淺事今譏漢史而不覺此謬恐後之譏今猶
今之譏古浩曰所謬云何允曰案星傳金水二

星常附日而行冬十月日且在尾箕昏沒於申南而東井方出於寅北二星何因背日而行是史官欲神其事不復推之於理浩曰欲爲變者何所不可君獨不疑三星之聚而怪二星之來允曰此不可以空言爭宜更審之時坐者咸怪唯東宮少傅游雅曰高君長於曆當不虛言也後歲餘浩謂允曰先所論者本不經心及更考究果如君語以前三月聚於東井非十月也又謂雅曰高允之術陽源之射也衆乃歎服允雖

明於曆數初不推步有所論說惟游雅數以災
異問允允曰昔人有言知之甚難既知復恐漏
泄不如不知也天下妙理至多何遽問此雅乃
止尋以本官爲秦王翰傅後勅以經授景穆甚
見禮待又詔允與侍郎公孫質李靈胡方圓共
定律令太武引允與論刑政言甚稱旨因問允
萬機何者爲先時多禁封良田又京師遊食者
衆允因曰臣少也賤所知唯田請言農事古人
云方一里則爲田三頃七十畝方百里則田三

萬七千頃若勤之則畝益三升不勤則畝損三升方百里損益之率爲粟二百二十二萬斛况以天下之廣乎若公私有儲雖遇饑年復何憂乎帝善之遂除田禁悉以授百姓初崔浩薦冀定相幽并五州士數十人各起家爲郡守景穆謂浩曰先召之人亦州郡選也在職已久勤勞未答今可先補前召外任郡縣以新召者代爲卽吏又守令宰人宜使更事者浩固爭而遣之允聞之謂東宮博士管恬曰崔其不免乎苟逞

其非而校勝於上何以能濟遼東公翟黑子有寵於太武奉使并州受布千疋事發黑子問允主止問我首乎諱乎允曰公帷幄寵臣答詔宜實中書侍郎崔鑒公孫質等咸言宜諱之黑子以鑒等爲覲已怒而絕允而不以實對終獲罪戮時著作令史閔湛郄勰性巧佞爲崔浩信待是浩所注詩書論語及易遂上疏曰馬鄭王賈不如浩之精微請收藏境內諸書班浩所注并求敕浩注禮傳浩亦表薦湛有著作才湛等又

勸浩刊所撰國史於石以彰直筆允聞之謂著作郎宗欽曰閔湛所營分寸之間恐爲崔門萬世之禍吾徒無類矣未幾而難作初浩之被收允直中書省景穆使召允留宿宮內翌日命驂乘至宮門謂曰入當見至尊吾自導卿脫至尊有問但依吾說既入見景穆言允小心慎密且微賤制由於浩請赦之帝召允謂曰國書皆浩作不允曰太祖記前著作郎鄧彥海所撰先帝記及今記臣與浩同作然而臣多於浩帝大怒

曰此甚於浩安有生路景穆曰天威嚴重允迷
亂失次耳臣向問皆云浩作帝問如東宮不允
曰臣罪應滅族不敢虛妄殿下以臣侍講日久
衰臣乞命耳實不問臣不敢迷亂帝謂景穆曰
直哉此亦人情所難而能臨死不移且對君以
實貞臣也寧失一有罪宜宥之允竟得免於是
召浩前使人詰惶惑不能對允事事申明皆有
條理時帝怒甚敕允爲詔自浩以下僮吏以上
一百二十八人皆夷五族允持疑不爲頻詔催

切允乞更一見然後爲詔詔引前允曰浩之所坐若更有餘釁非臣敢知直以犯觸罪不至死帝怒命介士執允景穆拜請帝曰無此人忿朕當有數千口死矣浩竟族滅餘皆身死宗欽臨刑歎曰高允其殆聖乎景穆後讓允以不同已所導之言而令帝怒允曰夫史籍帝王之實錄將來之炯誠今之所以觀往後之所以知今是以言行舉動莫不備載故人君慎焉然浩世受殊遇榮曜當時私欲沒其公廉愛憎蔽其直理

此浩之責也至於書朝廷起動之遊言國家得失之事此爲史之本體未爲多違然臣與浩寔同其事死生義無獨殊誠荷殿下再造之慈違心苟免非臣之意景穆動容稱歎允後與人言曰我不奉東宮導旨者恐負翟黑子也景穆季年頗親近左右營立田園以收其利允諫景穆不納景穆之崩也允久不進見後見升階歔歔悲不能止帝流淚命允使出左右莫知其故相謂曰允無何悲泣令至尊哀傷何也帝聞之召

而謂曰汝不知高允悲乎崔浩誅時允亦應死東宮苦請是以得免今無東宮允見朕悲耳先是敕允集天文災異使事類相從約而可觀允依洪範傳天文志撮其事要略其文辭凡爲八篇帝覽而善之曰高允之明災異亦豈減崔浩乎及文成卽位允頗有謀焉司徒陸麗等皆受重賞允既不蒙褒異又終身不言其忠而不伐皆此類也給事中郭善明性多機巧欲逞其能勸文成大起宮室允諫帝納之允以文成纂承

平之業而風俗仍舊婚娶喪葬不依古式諫稱
五異帝從容聽之或有觸違帝所不忍聞者命
左右扶出事有不便允輒求是帝知允意逆屏
左右以待之禮敬甚重晨入暮出或積日居中
朝臣莫知所論或有上事陳得失者帝省而謂
群臣曰君父一也父有是非子何爲不作書於
人中諫之使人知惡而於家內隱處也豈不以
父親恐惡彰於外也今國家善惡不能面陳而
上表顯諫此豈不彰君之短明已之美至如高

允者真忠臣矣朕有是非恒正言面論至朕所
不忍聞者皆侃侃論說無所避就朕聞其過而
天下不知其諫豈不忠乎汝等在左右不曾聞
一正言但伺朕喜以求官汝等以弓刀侍朕徒
立勞耳皆至公王此人執筆匡我不過著作郎
汝等不亦愧乎於是拜允中書令著作如故司
徒陸麗曰高允雖蒙寵待而家貧布衣妻子不
立帝怒曰何不先言今見朕用之方言其貧是
日幸允第唯草屋數間布被縕袍厨中鹽菜而

已帝歎息曰古人之清貧豈有此乎即賜帛五百疋粟千斛拜長子忱爲長樂太守允頻表固讓帝不許初與允同徵游雅等多至通官封侯及允部下吏百數十人亦至刺史二千石而允爲郎二十七年不徙官時百官無祿允恒使諸子樵採自給初尚書竇瑾坐事誅瑾子遵亡在山澤遵母焦沒入縣官後焦以老得免瑾之親故莫有恤者允愍焦年老保護在家積六年遵始蒙赦其篤行如此轉太常卿本官如故允上

代都賦因以規諷亦二京之流也時中書博士
索敞與侍郎傅默梁祚論名字貴賤著議紛紜
允遂著名字論以釋其惑甚有典證復以本官
領祕書監解太常卿進爵梁城侯初允與游雅
及太原張偉同業相友雅嘗論允曰夫喜怒者
有生所不能無也而前史載卓公寬中文饒洪
量褊心者或之弗信余與高子游處四十餘年
未見是非喜愠之色不亦信哉高子內文明而
外柔弱其言呐呐不能出口余常呼爲文子崔

公謂余云高生豐才博學一代佳士所乏者矯
矯風節耳余亦然之司徒之譴起於纖微及於
詔責崔公聲嘶股戰不能一言宗欽以下伏地
流汗都無人色高子敷陳事理申釋是非辭義
清辯音韻高亮明主爲之動容聽者無不稱善
仁及僚友保茲元吉向之所謂矯矯者更在斯
乎宗愛之任勢也威振四海嘗召百司於都坐
王公以下望庭畢拜高子獨升階長揖由此觀
之汲長孺可卧見衛青何抗禮之有向之所謂

風節者得不謂此乎知人故不易人亦不易知
吾既失之於心內崔亦漏之於形外鍾期止聽
於伯牙夷吾見明於鮑叔良有以也其爲人物
所推如此文成重允嘗不名之恒呼爲令公令
公之號播於四達矣文成崩獻文居諒闇乙弗
渾專擅朝命謀危社稷文明太后誅之引允禁
中參決大政又詔允曰朕稽之舊典欲置學官
於郡國卿儒宗元老宜與中秘二省參議以聞
允表請制大郡立博士二人助教四人學生一

百人次郡立博士二人助教二人學生八十人
中郡立博士一人助教二人學生六十人下郡
立博士一人助教一人學生四十人其博士取
博關經典履行忠清堪爲人師者年限四十以
上助教亦與博士同年限四十以上若道業夙
成才任教授不拘年齒學生取郡中清望人行
修謹堪束修名教者先盡高門次及中等帝從
之郡國立學自此始也後允以老疾頻上表乞
骸骨詔不許於是乃著告老詩又以昔歲同徵

零落將盡感逝懷人作徵士頌皇興中詔允兼
太常至兗州祭孔子廟謂允曰此簡德而行勿
有辭也後允從獻文北伐大捷而還至武川鎮
上北伐頌帝覽而善之帝時有不豫以孝文冲
幼欲立京兆王子推集諸大臣以次召問允進
跪上前涕泣曰臣不敢多言以勞聖聽願陛下
上思宗廟託付之重追念周公抱成王之事帝
於是傳位於孝文賜允帛百疋以標忠亮又遷
中書監加散騎常侍雖久典史事然不能專勤

屬述時與校書郎劉模有所緝綴大較依續崔
浩故事準春秋之體而時有刊正自文成迄於
獻文軍國書檄多允作也未乃薦高閭以自代
以定議之勲進爵咸陽公尋授懷州刺史允秋
月巡境問人疾苦至邵縣見邵公廟廢毀不立
乃歎曰邵公之德闕而不祀爲善者何望乃表
修葺之允於時年將九十矣勸人學業風化頗
行然儒者優遊不以斷決爲事後正光中中書
舍人河內常景追思允率郡中故老爲允立祠

於野王之南樹碑紀德焉太和二年又以老乞
還鄉章十餘上卒不聽許遂以疾告歸其年詔
以安車徵乞敕州郡發遣至都復拜鎮軍大將
軍領中祕書事固辭不許扶引就內改定皇誥
又被敕論集往世酒之敗德以爲酒訓孝文覽
而悅之常置左右詔乞乘車上殿朝賀不拜明
年詔乞議定律令雖年漸期頤而志識無損猶
心存舊職披考史書又詔曰乞年涉危境而家
貧養薄可令樂部絲竹十人五日一詣乞以娛

其志特賜允蜀牛一頭四望蜀車一乘素几杖
各一蜀刀一口又賜珍味每春秋致之尋詔朝
晡給御膳朔望致牛酒衣服綿絹每月送給允
皆分之親故是時貴臣之門並羅列顯官而允
子弟皆無官爵其廉退若此遷尚書散騎常侍
時延入備几杖詢以政事十年加光祿大夫金
章紫綬朝之大議皆諮訪焉其年四月有事西
郊詔御馬車迎允就郊所板殿觀騶馬忽驚奔
車覆傷肩三處孝文文明太后遣醫藥護療存

問相望司駕將處重坐允赦陳無恙乞免其罪
先是命中黃門蘇興壽扶持允曾雪中遇大驚
倒扶者大懼允慰勉之不令聞徹興壽稱共允
接事三年未嘗見其忿色恂恂善誘誨人不倦
晝夜手常執書吟咏尋覽篤親念故虛已存納
雖處貴重志同貧素性好音樂每至伶人弦歌
鼓舞常擊節稱善又雅信佛道時設齋講好生
惡殺魏初法嚴朝士多見杖罰允歷事五帝出
入三省五十餘年初無譴咎始真君中以獄訟

留滯始令中書以經義斷諸疑事允據律評刑三十餘載內外稱平允以獄者人命所係常歎曰臯陶至德也其後英蓼先亡劉項之際英布黥而王經世雖久猶有刑之餘翼況凡人能無咎乎性簡至不妄交遊獻文之平青齊徙其族望於代時諸士人流移遠至率皆饑寒徙人之中多允姻媾皆徒步造門允散財竭產以相贍賑慰問周至無不感其仁厚文隨其才能奏申用時議者皆以新附致異允謂取材任能無

宜抑屈先是允被召在方山作頌志氣猶不多損談說舊事了無所遺十一年正月卒年九十八初允每謂人曰吾在中書時有陰德濟救人命若陽報不差吾壽應享百年矣先卒旬外微有不適猶不寢卧呼醫請藥出入行止吟咏如常孝文文明太后聞而遣醫李脩徃脉視之告以無恙脩入密陳允榮衛有異懼其不久於是遣使備賜御膳珍羞自酒米至於鹽醢百有餘品皆盡時味及牀帳衣服茵被几杖羅列於庭

王官往還慰問相屬尤喜形於色語人曰天恩
以我篤老大有所資得以贍客矣表謝而已不
有他慮如是數日夜中卒家人莫覺詔給絹一
千疋布二千疋綿五百斤錦五十疋雜綵百疋
穀千斛以周喪用魏初以來存亡蒙賚者莫及
朝廷榮之將葬贈侍中司空公冀州刺史將軍
公如故謚曰文賜命服一襲尤所製詩賦詠頌
箴論表讚誄左氏釋公羊釋毛詩拾遺雜解議
何鄭膏肓事凡百餘篇別有集行於世尤尤明

算法爲算術三卷